

VENDIM
Nr.2, datë 10.1.2011

**PËR MIRATIMIN E UDHËZUESIT PËR APLIKIMIN DHE TARIFAT E LIDHJES SË RE APO
MODIFIKIMIT TË LIDHJES EKZISTUESE NË RRJETIN ELEKTRIK TË OST SHA**

Në mbështetje të neneve 9 dhe 26 të ligjit 9072, datë 22.5.2003 “Për sektorin e energjisë elektrike”, të ndryshuar, Rregullave të Praktikës dhe Procedurave të ERE-s, neni 18 pika 1 germa “c” të miratuar me vendimin nr.21, datë 18.3.2009, dhe pikës V.3.3 të Kodit të Rrjetit të Transmetimit, të miratuar me vendimin e Bordit të Komisionerëve nr.123, datë 24.10.2008, pikës 3.8.2 të licencës për aktivitetin e transmetimit, miratuar me vendimin e Bordit të Komisionerëve nr.35, datë 9.7.2004, Bordi i Komisionerëve të Entit Rregullator të Energjisë (ERE), në mbledhjen e tij të datës 10.1.2011, kërkesën e OST sh.a. për miratimin e “Tarifave të lidhjeve të reja” në rrjetin e transmetimit nëpërmjet një drafti të udhëzuesit “Për aplikimin dhe tarifatat e lidhjes së re apo modifikimit të lidhjes ekzistuese në rrjetin elektrik të OST”,

VENDOSI:

1. Të miratojë udhëzuesin për aplikimin dhe tarifatat e lidhjes së re apo modifikimit të lidhjes ekzistuese në rrjetin elektrik të OST sh.a., (bashkëlidhur këtij vendimi).
 2. Ngarkohet OST sh.a. për zbatimin e vendimit të Bordit të Komisionerëve të ERE-s.
 3. Ngarkohet Drejtoria Juridike dhe e Mbrojtjes së Konsumatorit të njoftojë OST sh.a. për këtë vendim.
- Ky vendim hyn në fuqi menjëherë.
Ky vendim botohet në Fletoren Zyrtare.

KRYETARI
Bujar Nepravishta

UDHËZUES
**PËR APLIKIMIN DHE TARIFAT E LIDHJES SË RE APO MODIFIKIMIT TË LIDHJES EKZISTUESE NË
RRJETIN ELEKTRIK TË OST-së**
Tiranë, dhjetor 2010

1. Hyrje
1.1 Qëllimi

Ky udhëzues përcakton mënyrën, formatin e aplikimit dhe tarifatat përkatëse, sipas të cilave paguhen lidhjet e reja, modifikimet ose rritja e kapacitetit të lidhjeve ekzistuese, në rrjetin elektrik të OST. Këto pagesa kryhen për qëllimin e shpenzimeve që ndërlidhen me këto procese.

1.2 Kërkesat ligjore

Ky udhëzues merr në konsideratë dhe zbaton kërkesat e ligjit për sektorin e energjisë elektrike, nr.9072, datë 22.5.2003, me shtesat dhe ndryshimet përkatëse, Kodit të Rrjetit të Transmetimit, Metodologjinë e përcaktimit të tarifës së shërbimit të transmetimit të përcaktuar nga ERE, si dhe aktet e tjera nënligjore që lidhen me funksionet kryesore të OST-së, në përputhje me licencën e marrë nga ERE.

2. Përkufizimet

Çdo përkufizim, i cili nuk gjendet në këtë dokument, mund të gjendet në ligjet përkatëse të sektorit të energjisë elektrike, në Kodin e Rrjetit–Kodi i Lidhjes, Rregullat e Tregut, Metodologjinë e Tarifave të ERE, e të tjera.

2.1 Termat e përkufizuar:

“Tarifa për aplikim (pagesa)” është pagesa në kohën kur aplikohet për lidhje, e cila mbulon studimin e pranueshmërisë së lidhjes në rrjetin e transmetimit dhe përgatitjen e dokumentacionit për hartimin e marrëveshjes së lidhjes.

“Përdoruesi” është pala e interesuar dhe që ka aplikuar ose është në proces për lidhje të re, modifikim

apo rritje të kapacitetit të lidhjes në rrjetin e OST-së.

“Aplikim për lidhje” është kërkesa për lidhje nga përdoruesi për lidhje të re, modifikim të lidhjes ekzistuese, përfshirë dhe rritjen e kapacitetit të lidhjes së vjetër në rrjetin e OST.

“Formati i aplikimit për lidhje” janë formate tip për lloj centrali gjenerues apo ngarkesë, përfshirë konsumator i kualifikuar, sikurse janë paraqitur në shtojcën 1.

“Kapaciteti i lidhjes” nënkupton fuqinë e plotë elektrike në MVA të ofruar për lidhje të re ose për rritje kapaciteti të lidhjes ekzistuese.

“Data e lidhjes” është data në të cilën asetet për lidhje janë apo konsiderohen të jenë plotësisht të lidhura në rrjetin e OST-së dhe që vetë OST-ja është në gjendje të sigurojë kapacitetin për lidhje.

“Oferta për lidhje” është një ofertë për lidhje në rrjetin e OST-së e dhënë brenda 60 ditëve ose 90 ditëve nga data e aplikimit për lidhje.

“Pala përgjegjëse për lidhje” është pala që mund të jetë përdoruesi ose/dhe OST-ja që merr përgjegjësinë për procesin e projektimit, tenderimit, ndërtimit, testimit dhe lëshimit në punë të një lidhjeje.

“Asetet direkte të lidhjes ose asetet indirekte” janë asetet që janë të ndërlidhura drejtpërdrejt me ndonjë ofertë të caktuar për lidhje.

“Afati i fundit për ofertë” është numri i ditëve pas dorëzimit të aplikimit për lidhje, brenda të cilave OST-ja duhet të bëjë ofertën për lidhjen.

“Tarifa për mbikëqyrje” është tarifa për kontrollin dhe vlerësimin e projektit teknik, mbikëqyrjen e ndërtimit, testimit dhe komisionimit të lidhjes.

“Përdoruesi i sistemit ose përdoruesi” është ai i lidhuri në sistemin e transmetimit duke qenë konsumator i lidhur direkt, furnizues në emër të konsumatorit të lidhur direkt, shpërndarës ose gjenerues.

“Lidhja e re” është central gjenerimi, linjë transmetimi, nënstacion, i lidhur në rrjetin e transmetimit në pikën/nyjën lidhëse, e përcaktuar me MVA, në nivelin nominal të tensionit.

“Pika e lidhjes” është pika e lidhjes fizike të një përdoruesi me rrjetin e transmetimit.

3. Përgjegjësit e lidhjes dhe tarifat

Tarifat për lidhje aplikohen vetëm ndaj lidhjeve të reja, modifikimit ose rritjes së kapacitetit të lidhjeve ekzistuese.

“Përdoruesi i sistemit” merr përgjegjësinë (është pala përgjegjëse për lidhje) për ndërtimin e aseteve të lidhjes (p.sh. të tenderojë dhe paguajë për blerjen, ndërtimin, testimin dhe vënien në punë) dhe:

- OST-ja do të mbikëqyrë procesin;
- pas lëshimit të suksesshëm në punë, OST-ja do të marrë pronësinë e aseteve të transmetimit deri në kufirin ndarës me asetet e përdoruesit, sipas përcaktimeve të Kodit të Rrjetit të Transmetimit.
- OST-ja do të ngarkojë tarifën për lidhje për përdoruesin, sipas përcaktimit të bërë në paragrafin 4.6.

4. Çështjet e zbatimit

4.1 Trajtimi i barabartë

Në pajtim me rregullat e tregut dhe licencën e OST-së, të gjithë përdoruesit do të trajtohen në baza jodiskriminuese, përveç nëse ka arsye të mirëfillta teknike për dallime.

4.2 Konfidencialiteti

I gjithë komunikimi ndërmjet një përdoruesi dhe OST-së është tërësisht konfidencial. OST-ja nuk do të diskutojë çështjet me palët e treta përveç nëse merr leje me shkrim nga përdoruesi.

4.3 Diskutimet paraprake

Përdoruesit ftohen të kenë diskutime fillestare me OST-në për lidhjet e mundshme. Si pjesë e këtyre diskutimeve, OST-ja mund të ofrojë një vlerësim paraprak dhe të përkohshëm për lidhjen. Këto diskutime preliminare nuk do të formojnë në vete një aplikim të lidhjes, por do të jenë nën një konfidencialitet të plotë.

4.4 Publikimi i kostos

OST-ja në faqen e saj në web do të publikojë vlerën aktuale të tarifës së aplikimit dhe tarifës për mbikëqyrje.

4.5 Aplikimi për lidhje

Të gjitha aplikimet për lidhje do të trajtohen në bazë të parimit “i pari vjen, i pari shërbehet”. Një përdorues mundet t’i dorëzojë OST-së një aplikim për lidhje për lidhjen e ngarkesës ose gjenerimit në rrjetin e OST-së, të modifikojë ose të rrisë fuqinë e lidhjes ekzistuese. Kjo bëhet duke plotësuar dhe dorëzuar një format të aplikimit për lidhje së bashku me pagesën e tarifës për aplikim, i cili mbulon studimin fillestar të projektit, administrimin dhe përgatitjen e marrëveshjes për lidhje. Aplikimi për lidhje do të theksojë palën

përgjegjëse për lidhje, i cili do të jetë përgjegjës për procesin e projektimit, tenderimit, ndërtimit, testimit dhe vënies në punë të lidhjes.

Aplikimi formal nga një përdorues do të nënkuptojë fillimin e planit kohor të lidhjes, që kërkon nga OST-ja të përgjigjet me një ofertë për lidhje brenda afatit të fundit për ofertë, që do të jetë:

- 60 ditë, kur janë mbajtur diskutime të suksesshme preliminare dhe studimet e projektit fillestar janë kryer plotësisht.

- 90 ditë, kur nuk është kryer ndonjë studim i përshtatshëm i sistemit dhe kërkohen të dhëna shtesë nga aplikuesi.

OST-ja realisht duhet të përgjigjet sa më shpejt që është e mundur.

Kur përdoruesi dëshiron të zbatojë lidhjen në disa faza kohore, atëherë përdoruesi:

- mund të vendosë të zbatojë vetëm fazën e parë me një aplikim për lidhje vetëm për atë fazë;

- mund të aplikojë formalisht për fazën e parë dhe të japë informacion për të gjitha fazat, përfshirë edhe afatet kohore;

- mund të aplikojë për të gjitha fazat me afatin kohor të përcaktuar për realizimin e secilës fazë.

Nëse oferta për lidhje pranohet duhet të nënshkruhet marrëveshja për lidhje.

4.6 Tarifa e lidhjes

Tarifa e lidhjes do të formohet prej dy njësive të veçanta.

1. Tarifa për aplikim (studimi i pranueshmërisë së lidhjes në rrjetin e transmetimit, përgatitja e dokumentacionit për marrëveshjen e lidhjes me përdoruesin). Kjo tarifë është fikse dhe do të paguhet në vlef të 300 000 (treqind mijë) lekë, në momentin e aplikimit për lidhje nga përdoruesi.

2. Tarifa për mbikëqyrje (tarifa për kontrollin dhe vlerësimin e projektit teknik, mbikëqyrjen e ndërtimit, testimit dhe komisionimit të lidhjes). Kjo tarifë do të jetë variabël në funksion të fuqisë së plotë të kërkuar, të deklaruar nga përdoruesi dhe do të ketë vlerën 50 lekë/KVA, por në të gjitha rastet nuk do të jetë më e madhe se vlefja kufitare prej 2.5 milion (dy milion e pesëqind mijë) lekësh. Pagesa e kësaj tarife bëhet nga përdoruesi në momentin e nënshkrimit të marrëveshjes së lidhjes dhe është parakusht për fillimin e punës.

Kostoja e aseteve të lidhjes, që përfshin koston e blerjes dhe ndërtimit të aseteve të lidhjes, mbulohet nga vetë përdoruesi, ndërsa kostoja e përfundimit të rrjetit të transmetimit dhe kostoja e O&M, mbulohen nga tarifa e shërbimit të transmetimit në përputhje me metodologjinë e tarifës së shërbimit të transmetimit, të aprovuar nga ERE.

4.7 Marrëveshja për lidhje

Nëse aplikuesit i pranohet kërkesa për lidhje, OST-ja dhe përdoruesi duhet të nënshkruajnë një marrëveshje lidhjeje.

Në marrëveshjen e lidhjes duhet të specifikohen kushtet e përgjithshme të lidhjes dhe çdo kusht specifik teknik dhe financiar i aplikuar në atë lidhje, në përputhje me Kodin e Rrjetit–Kodi i Lidhjes.

Në marrëveshjen e lidhjes duhet të përcaktohen gjithashtu:

1. përgjegjësitë për kontrollin dhe mirëmbajtjen e pajisjeve;

2. përgjegjësitë për operimin e pajisjeve;

3. përgjegjësitë për sigurinë e personelit.

4.8 Refuzimi për lidhje

OST-ja do të refuzojë një lidhje vetëm nëse ka arsye teknike për një gjë të tillë, siç shkruhet në Kodin e Rrjetit-Kodi i Lidhjes. Duke pasur parasysh se përdoruesi duhet të paguajë paraprakisht, nuk duhet të ketë asnjë arsye financiare për refuzim.

4.9 Anulimi (përfundimi) i lidhjes

Kur një përdorues dëshiron të anulojë marrëveshjen e lidhjes, ai duhet të njoftojë OST-në një vit para. OST-ja ka të drejtë të kalojë në pronësi të saj pa pagesë të gjitha asetet që kanë funksionin e transmetimit (deri në kufirin e matjes tregtare).

4.10 De-energizimi

De-energizimi i lidhjes nuk llogaritet si anulim (përfundim) i marrëveshjes për lidhje.

4.11 Ankesat

Cilido përdorues i sistemit ka të drejtë të ankohet në ERE për refuzimin për lidhje dhe për çdo mosmarrëveshje me OST për ofertën për lidhje.